

VENDIM
Nr. 274, datë 27.10.2022

**MBI RISHIKIMIN E KONTRATËS TIP PËR SHITBLERJEN E ENERGJISË
ELEKTRIKE NDËRMJET SHOQËRISË SË PRODHIMIT TË ENERGJISË
ELEKTRIKE TË NGARKUAR ME DETYRIMIN E SHËRBIMIT PUBLIK, AKSIONET
E SË CILËS KONTROLLOHEN, PLOTËSISHT OSE PJESËRISHT NGA SHTETI,
KESH SHA DHE FURNIZUESI I SHËRBIMIT UNIVERSAL (FSHU) SHA, PËR
FURNIZIMIN E KLIENTËVE QË FURNIZOHEN NGA FSHU SHA,
PËR PERIUdhËN KOHORE 1.1.2022 DERI MË 31.12.2022**

Në zbatim të neneve 16, 20, germa “h”, 47, 56, germa “P”, si dhe 90, të ligjit nr. 43/2015, “Për sektorin e energjisë elektrike”, të ndryshuar; pjesës I, nenit 4, pikës 7, të vendimit të Këshillit të Ministrave (VKM) nr. 456, datë 29.6.2022, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”; VKM-së nr. 650, datë 10.10.2022, “Për disa ndryshime në vendimin nr. 584, datë 8.10.2021, të Këshillit të Ministrave, “Për shpalljen e gjendjes së emergjencës në furnizimin me energji elektrike”; kapitullit V, të “Rregullat e Tregut Shqiptar të Energjisë Elektrike”, miratuar me vendimin e Bordit të Entit Rregullator të Energjisë (ERE) nr. 139, datë 15.8.2016, të ndryshuar; “Kodi i Transmetimit”, miratuar me vendimin e Bordit të ERE-s nr. 63, datë 11.4.2022, si dhe nenit 15 të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; Bordi i ERE-s, në mbledhjen e tij të datës 27.10.2022, pasi shqyrtoi relacionin me nr. 1829/4-1 prot., datë 26.10.2022, të përgatitur nga drejtoritë teknike “Mbi miratimin e kontratës tip për shitblerjen e energjisë elektrike ndërmjet shoqërisë së prodhimit të energjisë elektrike të ngarkuar me detyrimin e shërbimit publik, aksionet e së cilës kontrollohen plotësisht ose pjesërisht nga shteti, KESH sh.a. dhe furnizuesi i shërbimit universal (FSHU) sh.a., për furnizimin e klientëve që furnizohen nga FSHU sh.a., për periudhën kohore 1.1.2022 deri më 31.12.2022”,

konstatoi se:

- Me shkresën e përbashkët nr. 4845/1 prot., datë 30.9.2022, shoqëritë KESH sh.a. dhe FSHU sh.a. kanë dërguar në ERE kërkesën për miratimin e kontratës me nr. 4670 prot., datë 30.9.2022, (FSHU sh.a.) dhe nr. 6926 prot., datë 30.9.2022 (KESH sh.a.), të miratuar dhe nënshkruar ndërmjet palëve FSHU sh.a. dhe KESH sh.a.

- Baza ligjore e referuar në këtë kontratë është:

- Neni 20, germa “h”, e ligjit nr. 43/2015, “Për Sektorin e Energjisë Elektrike”, të ndryshuar;

- Vendimi nr. 456, datë 29.6.2022, i Këshillit të Ministrave, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”;

- Vendimi nr. 584, datë 8.10.2021, i Këshillit të Ministrave, “Për shpalljen e gjendjes së emergjencës në furnizimin me energji elektrike”, të ndryshuar;

- Vendimi nr. 23, datë 25.3.2009, i Bordit të Komisionerëve të Entit Rregullator të Energjisë, “Mbi rinovimin e licencave në aktivitetin e prodhimit dhe tregimit të energjisë elektrike shoqërisë KESH sh.a.”, i ndryshuar;

- Vendimi i Bordit të ERE-s nr. 112, datë 8.7.2016, “Për përcaktimin e të licencuarit të ngarkuar me detyrimin e shërbimit universal për tregun e energjisë elektrike dhe përcaktimin e kushteve për ushtrimin e detyrimit të shërbimit universal”;

- Vendimi nr. 215, datë 11.10.2018, i Bordit të ERE-s, “Mbi transferimin e licencës së furnizimit të energjisë elektrike me nr. 251, me seri P14FPP, miratuar me vendimin e Bordit të ERE-s nr. 97, datë 27.10.2014, e vlefshme deri më datë 27.10.2019 dhe detyrimit të shërbimit universal të furnizimit të energjisë elektrike, të shoqërisë Operatori i Shpërndarjes së Energjisë Elektrike sh.a. (OSHEE sh.a.), miratuar me vendimin e Bordit të ERE-s nr. 112, datë 8.7.2016, të shoqëria “Furnizuesi i Shërbimit Universal” sh.a. (FSHU sh.a.)”, i ndryshuar;

- Vendimi nr. 164, datë 4.11.2019, i Bordit të ERE-s, “Mbi rinovimin e licencës së shoqërisë Furnizuesi i Shërbimit Universal sh.a. (FSHU sh.a.), në veprimtarinë e furnizimit të energjisë elektrike”;

- Vendimi i ministrit përgjegjës për energjinë nr. 1394/1 prot., datë 16.2.2022 (në cilësinë e përfaqësuesit të shtetit si pronar i aksioneve të subjektit prodhues, i ngarkuar me detyrimin e shërbimit publik), i Asamblesë së Përgjithshme të Shoqërisë për miratimin e çmimit të shitjes së energjisë elektrike për qëllime të furnizimit të Furnizuesit të Shërbimit Universal.

- Palët respektivisht KESH sh.a. dhe FSHU sh.a. kanë referuar si bazë ligjore, VKM-në nr. 456, datë 29.6.2022. Kjo reference ligjore është e saktë, por e paplotë, pasi kjo VKM shtrinë efektet nga data 29.6.2022 e në vijim, ndërkohë kontrata e referuar në ERE shtrinë efektet për periudhën 1.1.2022–31.12.2022.

- Në pikën 2 të VKM-së nr. 456, datë 29.6.2022, rezulton se VKM-ja nr. 244/2016 dhe VKM-ja nr. 620/2021. të ndryshuara, shfuqizohen. Për periudhën 1 janar 2022 e deri në momentin e hyrjes në fuqi të VKM-së nr. 456, datë 29.6.2022, marrëdhëniet ndërmjet palëve janë rregulluar bazuar në VKM-në nr. 620, datë 22.10.2021, “Për miratimin e kushteve, për vendosjen e detyrimit të shërbimit publik ndaj të licencuarve në sektorin e energjisë elektrike, gjatë gjendjes së emergjencës në furnizimin me energji elektrike dhe për përballimin e parandalimin e saj, ndryshuar me VKM-në nr. 757, datë 9.12.2021. Në këtë kontekst Palët duhet të rishikojnë kontratën e nënshkruar ndërmjet tyre, duke marrë në konsideratë VKM-të e sipërcituara dhe periudhat për të cilat ato kanë efekte juridike. Pasi për periudhën 1.1.2022–31.12.2022, VKM-të kanë fuqi juridike për pjesë të ndryshme të vitit.

- Kërkesa e përbashkët e shoqërive KESH sh.a. dhe FSHU sh.a., për miratimin e kontratës me nr. 4845 prot., të KESH sh.a., datë 30.9.2022., dhe me nr. 6926 prot., të FSHU sh.a. datë 30.9.2022, konsiston në miratimin e kontratës tip për shitblerjen e energjisë elektrike ndërmjet shoqërisë së prodhimit të energjisë elektrike të ngarkuar me detyrimin e shërbimit publik, aksionet e së cilës kontrollohen plotësisht ose pjesërisht nga shteti (KESH sh.a.) dhe Furnizuesi i Shërbimit Universal (FSHU) sh.a., për furnizimin e klientëve që furnizohen nga FSHU sh.a. për periudhën kohore 1.1.2022–31.12.2022.

- Kërkesa e palëve konsiston në miratimin e kontratës tip, por në të njëjtën kohë kontrata tip e mëparshme e miratuar nga ERE, me vendimin nr. 73, datë 22.4.2020, ndryshuar me vendimin e Bordit të ERE nr. 4, datë 15.1.2021, nuk është për një afat të përcaktuar kohor sikurse kërkuar nga palët për kontratën e re për periudhën kohore 1.1.2022–31.12.2022.

- KESH sh.a. dhe FSHU sh.a. duhet të bëjnë saktësimet përkatëse nëse kontrata e përcjellë në ERE është një kontratë tip që do të përdoret për çdo rast ndërmjet palëve apo është një kontratë vetëm për një periudhë të caktuar kohore.

- Në nenin 2 të kontratës së nënshkruar përcaktohet, se:

- Sasia e kontraktuar, e nominuar për vitin, që shitësi është i detyruar të furnizojë blerësin, është e gjithë sasia e nevojshme për plotësimin e kërkesës së plotë të blerësit, kjo referuar programeve mujore/javore/ditore/*intra-day*, sipas parashikimeve të neneve 4 dhe 5 të kësaj kontrate.

- Çmimi i shitjes së energjisë elektrike për vitin 2022 është ai i miratuar me vendimin e Asamblesë së Përgjithshme të Shitësit nr. 1394/1 prot., datë 16.2.2022, i ndryshuar, dhe sipas këtij vendimi

është 2.6 lekë/Kwh për energji, e cila shërben për furnizimin nga FSHU-ja të klientëve të lidhur në rrjetin e shpërndarjes të tensionit të ulët, 0.4 kV dhe 12 lekë/kwh për energjinë që shërben për furnizimin nga FSHU-ja si Furnizues i Mundësisë së Fundit (FMF) të klientëve të lidhur në rrjetin e shpërndarjes së tensionit të mesëm 6/10/20 kV.

- Çmim i përdorur për këtë kontratë është ai i Asamblesë së Përgjithshme të Shitësit nr. 1394/1 prot., datë 16.2.2022, i ndryshuar, dhe sipas këtij vendimi është 2.6 lekë/kwh. Bordi i ERE-s, me vendimin nr. 242, datë 23.9.2022, vendosi mbi kërkesën e shoqërisë FSHU sh.a., lidhur me kostot që duhet të përfshihen në llogaritjen e çmimit me pakicë të energjisë për klientët familjarë me konsum mbi 800 kwh në muaj.

- Vlerësohet, se: “Detyrimi i shërbimit publik i vendosur nga Këshilli i Ministrave, ndër të tjera përcakton detyrimin e KESH sh.a., për furnizimin me energji elektrike për të gjithë klientët të cilët furnizohen në kushtet e shërbimit universal nga FSHU sh.a. Në përputhje me VKM-në e sipërcituar, Asambleja e Përgjithshme e Aksionarit të KESH sh.a., me anë të vendimit nr. 6645/1, datë 8.9.2022 ka vendosur në pikën 1 të tij, miratimin e çmimit të shitjes së energjisë elektrike për FSHU sh.a., sipas tabelës vijuese”:

Energji e shitur për konsum klientë familjar në TU, deri në 800 KWh/Muaj	2.6 ALL/KWh
Energji e shitur për konsum klientë familjar në TU, mbi 800 KWh/Muaj	34.3 ALL/KWh
Energji e shitur për konsum klientë jo familjar në TU	2.6 ALL/KWh
Energji e shitur për konsum klientë në Tension të mesëm TM, 6/10/20 KV	12 ALL/KWh

- Në këto rrethana vlerësohet se në kontratën e nënshkruar nga palët dhe të përcjellë në ERE nuk është reflektuar vendimi i Bordit të ERE-s nr. 242, datë 23.9.2022, si dhe në vendimin e Asamblesë së Përgjithshme të Aksionarit të KESH sh.a., nr. 6645/1, datë 8.9.2022.

- Gjithashtu, pika 4 e kontratës tip evidenton dhe kërkesën vjetore për energji elektrike, në këto rrethana evidentimi i kërkesës në nenin 2, pika 1, e kontratës së propozuar do të çonte në dhënien e një sasive indikative/të planifikuar, e cila do të evidentonte dhe sasinë vjetore të energjisë elektrike, e cila rregullohet me programet në vijim mujore/javore/ditore/*intra-day*. Për rrjedhojë, palët KESH sh.a. dhe FSHU sh.a. duhet të evidentojnë sa më sipër në kontratën ndërmjet tyre, në mënyrë që të ketë dhe një sasi vjetore të programuar për këtë kontratë.

- Palët kanë bërë rregullimet përkatëse në kontratën me nr. 4845 prot., të KESH sh.a., datë 30.9.2022, dhe me nr. 6926 prot., të FSHU sh.a., datë 30.9.2022. Këto ndryshime prekin dhe elemente që lidhen me afatin e pagesave, e cila ndryshon nga 30 ditë në 45 ditë, po ashtu mënyrën e faturimit, e cila ndryshon dhe për faktin se FSHU sh.a. shërben dhe si FMF. Në këto kushte Palët KESH sh.a. dhe FSHU sh.a. duhet të bëjnë me dije në ERE, nëse ndryshimet në kontratë sjellin kosto shtesë për ato.

- Për rrjedhojë, është e nevojshme që palët të rishikojnë kontratën e përcjellë në ERE me shkresën e përbashkët të KESH sh.a., me nr. 4845/1 prot., datë 30.9.2022, dhe të FSHU sh.a. me nr. 6926/1 prot., datë 30.9.2022, kontratën me nr. 4845 prot., të KESH sh.a., datë 30.9.2022., dhe me nr. 6926 prot., të FSHU sh.a. datë 30.0.2022, duke reflektuar vlerësimet e sipërcituara.

Për gjithë sa më sipër, Bordi i ERE-s

VENDOSI:

1. Shoqëria e prodhimit të energjisë elektrike e ngarkuar me detyrimin e shërbimit publik, aksionet e së cilës kontrollohen plotësisht ose pjesërisht nga shteti, KESH sh.a. dhe Furnizuesi i Shërbimit Universal (FSHU) sh.a., të rishikojnë bazën ligjore, nenet 1, 2, 9, 14 dhe 21 të kontratës së dërguar në ERE me shkresën e përbashkët të KESH sh.a., me nr. 4845/1 prot., datë 30.9.2022, dhe të FSHU sh.a. me nr. 6926/1 prot., datë 30.9.2022, kontratën me nr. 4845 prot., të KESH sh.a., datë 30.9.2022., dhe me nr. 6926 prot., të FSHU sh.a. datë 30.9.2022.

2. Drejtoria Juridike dhe e Zgjidhjes së Mosmarrëveshjeve të njoftojë të shoqëritë KESH sh.a., dhe FSHU sh.a. për vendimin e Bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t'i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të Bordit, në rast se ka siguruar prova të reja që mund ta çojnë Bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti